


"Hallo...  
...liebi Aawäsendi,  
jetzt müend ihr ganz genau zue lose!"



**"WAS IGH NO HA WELLE SÄGE..."**

Liebi Theater-Lüt vo de TGW  
es freut mich jetzt doo alli z'gsee  
am Chlaushock, do z'mittst im Wald  
wann s Rägnet isch es grüsig und isch chalt.


Ich, de Chlaus ha hütt kei Zyt  
zudem isch mir de Wäg viel z'wiit  
ich ha hütt öppis anders z'tue  
und will emol in aller Rueh  
go luege im Gasthof Krone  
denn ich weiss, es wird sich lohne  
de Sou-Stall det go inspiziere  
und d'Chuchi goge kontrolliere!



De Wirt, Sepp Stadler häd überall Dräck  
i de Pfanne, uf de Täller und im Bsteck.  
Zum schaffe isch er meischtens z'fuul  
häd immer nume e grosses Muul.



Zudem isch er en Lugi-Hund  
wann d'Felber zur Kontrolle chund.  
Ganz gemein liimet er sini Kumpel ine:  
Es heig Hundefleisch i de Vitrine  
und bim Beck soll si au go sueche  
Mehlwürm im Brot und au im Chueche.  
Und de Polizischt lüügt er au no aa  
seit: Er heissi Stadelmaa.



De Polizisch – zwar nöd grad schlau  
kontrolliert Güselsäck aber ganz genau  
git vertraulich Uskunft wie en Depp  
und das merkt au de Stadler Sepp.  
De Kommissar isch aber en tolle Maa  
und chönt alles vo de Fraue haa.



Vom G'sundheitsamtt isch d'Frida Felber.  
Si kontrolliert am liebschte alles sälber,  
wird aber vom Sepp manipuliert  
dass si de Beck und Metzger kontrolliert.  
Sie macht derbi es cheibe G'stürm  
wäge Hundefleisch und Würm.  
Ihres Hirni schaltet si nur sälte ii  
sie häd kei Ahnig vo Geographie.



Aber eis merkt mer scho zemmlig  
sie möcht gern d'Wirtin vo de Krone sii.



De Rolf macht Brot, Gipfeli und Chueche  
und d'Rosa muess ihn immer i de Beiz go sueche.  
Jasse, suuffe und nüüt tue  
aber au b'soffe, wie ne Chue  
d'Rosa häd alle Grund zum flueche  
er mach im August 3-Königschueche.



De Kari lacht und häd ei Wöhli  
isch so eine nöd en Löli?  
Das Lache aber glii vergoht  
will sis „Brootestuck" grad vor ihm stoot.  
D'Senta, sini rabiati Frau  
weiss es nämli ganz genau  
dass de Kari, sackkanonevoll und b'soffe  
met sim G'wehr en Hund statt e Sou häd troffe!  
Sie befürchtet jetzt en grosse Schade  
im gantze Dorf, für ihre Lade.



D'Rosa und d'Senta sind jetzt stuur  
verpassed ihrne Manne e Fitness-Kur.  
Händ derbii aber nöd überleit  
dass de Manne s'Hirni i d'Hose g'heit.  
Die meined nämli Walking-puur  
sig au no en Erotik-Kur  
und die beide Fraue, Gabi und Bea  
chönnt mer eifach gratis haa.



Aber do händ die beide falsch kalkuliert  
und nach em Waldlauf resigniert  
uuskotzed und mit weiche Knoche  
sind die beide zämebroche.

De Rolf probiert nomol bim Chäferli sis Glück  
und de Kari goot hei zu sim Brootestück.



Gabi und Bea händ viel im Sinn  
uss de Krone git's es Holyday-Inn.  
Mit Wellness, Fitness, nume s'Bescht  
für riichi und feudali Gäscht.  
Ob das jemals funktioniere tuet?  
Ich glaube schwer – „Jetzt chunts ned guet!“



En liebe Gruess vo Euem Samichlaus



Bruno Hauenstein

Chlaushck  
im Novämber 2012